

Ini Sa Muna Igsulat Denu Si SAMUWÉL

Ini Denu Sa Libelu 1 Samuwél

Na, iya sa egtulonen siini muna igsulat denu si Samuwél sa egoh sa medoo tegeIslaél mig-eked sa medoo ulu-ulu ginela i Nemula pinengadanan da tegekukum anì dumuen polo sa datù da. Iya sa nekehudihudi ulu-ulu da si Samuwél, agulé nekesetugdug diyà si Samuwél si Saulo sa anay datù da. Tinulon ma dahini sa medoo binaelan i Dabid egoh di endà pa datù.

Ini sa netiigan ta danà siini igsulat mepion sa ketamanan sa etaw amuk mangunut diyà si Nemula, dodoo mekesugsug polo sa etaw endà mangunut diyà kenagdi.

Na, endà langun di igsulat diyà sa kagi Menubù sa muna igsulat denu si Samuwél.

Ini Sa Egoh I Samuwél Miglesut

1 ¹Na, duen sa maama si Elkanah tugod i Ipelaim mig-ugpà diyà sa menuwa Lama diyà sa getan-getan sa uwang tanà sa medoo tugod i Ipelaim. Iya sa emà i Elkanah si Héloham, owoy si Ilihu sa bébê di, owoy si Tohu sa bébê lulud di, owoy si Sup tugod i Ipelaim sa bébê siku di. ²Duwa sa sawa i Elkanah, si Hana owoy si Pénina. Atung mig-anak Pénina i, dodoo si Hana endà mig-anak di.

³Uman palay eg-ipanaw Elkanah i kedu diyà sa menuwa di eg-angay diyà sa menuwa Silo kenà da egsimbà enù ka eg-angay da eg-ulow sa hinagtay inimatayan da ibegay da diyà si Datù Nemula épê dakel egkegaga. Na, iya sa tegesimbà dahiya sa duwa anak i Ili, si Opni owoy si Pinehas. ⁴Uman da eg-imatay Elkanah i sa hinagtay ibegay da diyà si Nemula, duen sa hagda baed kaenen da. Egoh i egtalad sa kaleni, egbegayan di sebaed Pénina i owoy sigbaeday ma diyà sa medoo anak di maama owoy bayi. ⁵Dodoo apiya di pa tigtu eghiduwan di Hana i, sebaed daa sa igbegay di diyà kenagdi enù ka endà tinabangan i Datù Nemula duu egpeanak.^a ⁶Na, danà di endà eg-anak Hana i,

^a 1:5 Mebaluy ma guwaen di, “Dodoo si Hana, mesiglapeg sa baed eg sakemen di enù ka tigtu eghiduwan i Elkanah apiya di pa endà tinabangan i Datù Nemula duu egpeanak.”

takaan i Pénina egpeumàumaan sa muna di. ⁷Anan dé hediya sa egbaelan di diyà kenagdi uman palay. Uman da eg-angay diyà sa kenà da eggsimbà diyà si Datù Nemula dutu Silo dò, egbogowen i Pénina Hana i taman mekesinegaw owoy mekeeked ma kumaen. ⁸Agulé eg-igsà Elkanah i sawa di, guwaen di, “O Hana, ngadan sa eggsinegawan ko owoy sa pesuwan ko endà egkaen ka? Maen di ya egkehediya sa pedu ko? Enù di ya, uman ka pa meanggan danà sa kehidu ku keniko diyà sa kekeanggan ko amuk umanak ka sepulù anan maama?”

⁹Na, sebaen agdaw egoh da dema dutu Silo dò, egoh da neubus egkaen, migtigdeg Hana i enù ka mangay sumimbà diyà si Datù Nemula. Na, egpenuu Ili i sa tegesimbà diyà sa selat sa simbaan da. ¹⁰Tigtu mebegat sa pedu i Hana owoy egtemù eggsinegaw egoh di eggsimbà diyà si Datù Nemula. ¹¹Migpasad egoh di eggsimbà, guwaen di, “O Datù Nemula épê dakel egkegaga, hiduwi ko aken i eggsugùsuguen ko danà ku egkepelihay. Tabangi ko ma aken anì endà mesalidan ko duu aken. Amuk peanaken ko aken maama, ipasad ku meheniko kagdi ya taman sa lugay di mehagtay owoy ipasad ku ma endà ipetagped ku duu sa balut ulu di.”^b

¹²Na, sa lugay i Hana migsimbà diyà si Datù Nemula, takaan i Ili eg-inengteng. ¹³Migsimbà pedu daa Hana i, huenan di takà egbadàbadà. Endà duen sa kagi di egdinegen. Huenan di, iya sa antap i Ili egkelangut. ¹⁴Agulé mig-ikagi diyà si Hana, guwaen di, “Enget dé iya wé kepelangut ko. Yaka eg-uman na eg-inem sa mekelangut.”

¹⁵Migsagbì Hana i, guwaen di, “O Datù, endà egkelangut a. Endà eg-inemen ku duu sa mekepelangut. Dodoo eggsimbà a polo egpegeni tabang diyà si Datù Nemula danà sa dakel kelikutan ku. ¹⁶Yaka egpenemdem duu amuk aken sa bayi dupang. Eggsimbà a éhê ini i danà di egkebukul a temù.”

¹⁷Na, egoh i Ili neketiig iya wé, guwaen di, “Amuk hediya, likù ka dé owoy kumelanih dé sa pedu ko, owoy mebegayan ka ma sa egpegeniyen ko danà i Nemula sa egpigtuuwen ta, kita i medoo tegeIsaél.”

¹⁸Mig-ikagi Hana i, guwaen di, “O Datù, ungayà ku metuuwan ka diyà kenak, aken i eggsugùsuguen ko.” Agulé, miglegkang Hana i owoy mig-angay egkaen owoy endà dé nebukul di.

¹⁹Na, egoh di sumimag, miglapus da pelawà eg-angay eggsimbà diyà si Datù Nemula. Agulé miglikù da dutu Lama dò. Na, egoh i Elkanah neseuma lawa sa sawa di si Hana, dinineg i Nemula sa kinepegeni i Hana. ²⁰Agulé egoh di nelugaylugay, egkelalingen dé owoy mig-anak maama owoy pinengadanan di si Samuwél, enù ka guwaen di “Ini sa pinegeni ku diyà si Datù Nemula.”

^b 1:11 Guwaen di, “Endà ipetagped ku duu sa balut ulu di,” enù ka egoh anay iya sa tandà di si Nemula sa épê sa etaw.

Ini Sa Egho I Hana Migbegay Si Samuwél Diyà Si Nemula

(1 Samuwél 1:21-28; 2:11,18-21)

²¹Na, neuma dema sa atas da i Elkanah owoy sa malayan di mangay diyà sa menuwa Silo enù ka sumimbà da owoy umulow da ma sa hinagtay ibegay da diyà si Datù Nemula, éhê mendaa sa egbaelan da uman palay. Egho iya wé palay, duen sa sebaen ma hinagtay ulowen i Elkanah enù ka ipetuu di sa igpasad di. ²²Dodoo egho iya, endà mig-unut Hana i eg-angay dutu. Guwaen di diyà sa sawa di, “Endà pelawà mangay a dutu, dodoo amuk pitasen ku dé siini anak ku, uwiten ku doo dutu anì ibegay ku diyà si Datù Nemula. Taman sa lugay di nehagtay, umugpà dutu siedò kenà ta egsimbà.”

²³Migsagbì Elkanah i, guwaen di, “Na, baeli ko dé sa mepion egpenemdemen ko. Ugpà ka daa dahini taman sa egho ko mitas kenagdi. Metabangan i Datù Nemula kuna anì meketuu sa igpasad ko diyà kenagdi.” Hê, mig-ugpà Hana i diyà sa menuwa da taman sa egho di sumabuh sumusu sa anak di.

²⁴Na, egho i Hana migpitas dé si Samuwél, apiya di pa diisek pelawà inuwit di diyà sa kenà da egsimbà diyà si Datù Nemula dutu Silo dò. Inuwit da ma sa sebaen maama sapì telu gepalay dé sa kelukes di, owoy sa tengà sakù alina owoy sa kunul hinagtay tinaguan wain. ²⁵Egho da neubus mig-imatay sa sapì danà da egpesalamat diyà si Nemula, inuwit da Samuwél i diyà si Ili sa tegesimbà. ²⁶Agulé mig-ikagi Hana i diyà si Ili, guwaen di, “O Datù, amuk metulengan ko sa egho ko mighaa kenak egho anay, aken siedò bayi migtigdeg dahini sa egho ku egsimbà diyà si Datù Nemula. ²⁷Iya sa pinegeni ku diyà kenagdi anì begayan di aken anak. Hê, neketuu dé, ibegay di diyà kenak sa pinegeni ku. ²⁸Huenan di, ibegay ku dé siini anak ku diyà si Datù Nemula danà sa igpasad ku diyà kenagdi, anì mangunut diyà kenagdi taman sa lugay di nehagtay pelawà.” Agulé migsimbà da eg-olò si Datù Nemula.

2 ¹¹Agulé egho da neubus egbael sa langun uyot da dahiya, miglikù da Lama dò Elkanah i owoy sa malayan di. Dodoo si Samuwél, endà egpeunuten da duu enù ka mangunut dé diyà si Datù Nemula danà sa ketulù i Ili sa tegesimbà.

¹⁸Na, takà egpangunut Samuwél i diyà sa galebek igsugù i Datù Nemula owoy egginis ma sa kawal sa tegesimbà apiya di pa batà pelawà. ¹⁹Uman palay amuk meuma sa keangay sa lukes di diyà Silo anì ihated da sa ibegay da diyà si Nemula, uwiten sa inay di ma sa magtu kawal binaelan di ibegay di diyà si Samuwél. ²⁰Agulé igsimbà i Ili anì metabangan i Nemula Elkanah i owoy sa sawa di, guwaen di, “Ungayà ku peanaken i Datù Nemula kiyu anì dumuen sa anak yu mekesambì diyà siini anak yu igsimbà yu owoy ibegay yu diyà si Nemula.”

Na, amuk neubus sa egbaelan da i Elkanah, lumikù da dema.

²¹Agulé neketuu doo sa igsimbà i Ili denu kenagda. Tinabangan i Datù Nemula dé Hana i, hê mig-anak da uman, telu maama owoy duwa bayi. Na, miglenuk dé Samuwél i danà i Datù Nemula eg-ipat.

Ini Sa Egoh I Nemula Migpehaa Diyà Si Samuwél

3 ¹Na, takà egpangunut Samuwél i diyà sa galebek igsugù i Datù Nemula danà sa ketulù i Ili. Egoh iya, endà iseg di duen sa eg-ikagiyeen i Datù Nemula diyà etaw owoy endà ma dé iseg di medoo sa igpehaa di diyà etaw. ²Na egoh iya, eglabunan dé sa mata i Ili, owoy endà ma iseg di eg-ilag.

Hê, sebaen sigepe egtudug Ili i diyà sa bilik di. ³Owoy egtudug ma Samuwél i selatal sa Baul Tandà sa Igpasad i Nemula, enù ka eg-ugpà diyà sa dalesan kenà da egsimbà. Na, egoh di endà pa umawang sa tanà ligò di eglegdaw doo sa sulù dahiya, ⁴mig-umow Datù Nemula i diyà si Samuwél.

Migsagbì Samuwél i, guwaen di, “Kaini a doo.” ⁵Hê, migletu eg-angay diyà si Ili owoy guwaen di, “Kaini a dé, enù ka inumow ko aken.”

Dodoo migsagbì Ili i, guwaen di, “Endà inumow ku duu kuna, Adug. Angay ka dema tudug.” Agulé migpelikù dema Samuwél i diyà sa kenà di egtudug.

⁶Agulé inumow i Datù Nemula dema. Huenan di, mig-enaw Samuwél i owoy mig-angay dema diyà si Ili. Guwaen di, “Kaini a dé, enù ka inumow ko aken.”

Dodoo migsagbì Ili i, guwaen di, “Endà inumow ku duu kuna, Adug. Angay ka dema tudug.”

⁷Iya sa binaelan i Samuwél enù ka endà pa nelayaman di duu sa kagi i Datù Nemula, enù ka endà pa egsetawiten i Nemula duu edung sa egoh di eg-ugpà dahiya. ⁸Agulé inumow i Datù Nemula dema Samuwél i sa ketelu di gulê. Hê, mig-enaw Samuwél i owoy mig-angay diyà si Ili, owoy guwaen di, “Kaini a dé enù ka inumow ko aken.”

Agulé netiigan i Ili dé si Datù Nemula sa eg-umow si Samuwél. ⁹Huenan di, guwaen di diyà si Samuwél, “Angay ka dema tudug. Amuk dinegen ko dema sa eg-umow keniko, ikagi ka, guwaen ko, ‘Sumalà dé sa ikagiyeen ko diyà kenak, o Datù Nemula, ikagi ko dé enù ka dinegdinegen ku, enù ka aken sa egsugùsuguen ko.’” Agulé, mig-angay dema eghibat Samuwél i.

¹⁰Agulé mig-angay Datù Nemula i migdapag diyà si Samuwél, owoy eg-umowen di dema lagà sa egoh muna, guwaen di, “O Samuwél, Samuwél.”

Hê, tinultul i Samuwél sa igtulù i Ili egoh di egsagbì, guwaen di, “O Datù Nemula, ikagi ka enù ka dinegdinegen ku, enù ka aken sa egsugùsuguen ko.”

¹¹Agulé mig-ikagi Datù Nemula i diyà kenagdi, guwaen di, “Endà iseg di melugay dumuen sa baelan ku diyà sa medoo tegeIslaél sa dakel megaipan sa langun etaw dumineg sa lalag di. ¹²Amuk meuma iya wé agdaw, ipetuu ku doo sa langun medaet tinulon ku diyà sa malayan i Ili, enù ka endà duen sa sebaen endà meketuu. ¹³Tinulon ku dé diyà kenagdi endà duen ketamanan sa kepigtamay ku sa langun malayan di, enù ka egsumbungen sa medoo anak di aken. Apiya di pa netiigan i Ili iya wé medaet egbaelan da, endà eg-indawen di duu kagda. ¹⁴Huenan di, ipasad ku diyà sa malayan i Ili endà duen sa mebaluy itigtu diyà sa medaet binaelan sa medoo anak di, sumalà dé sa imatayan da ataw ka sa ibegay da diyà kenak.”

¹⁵Na, tapay doo eghibat Samuwél i taman sumimag. Agulé egoh di egawang dé, inukaan di dema sa pintù simbaan da. Dodoo nelimedangan egtulon diyà si Ili sa inikagi i Datù Nemula diyà kenagdi. ¹⁶Hê, inumow i Ili, guwaen di, “O Samuwél, anak ku.”

Migsagbi Samuwél i, guwaen di, “Kaini a doo.”

¹⁷Mig-igsà Ili i, guwaen di, “Ngadan sa inikagi i Datù Nemula diyà keniko? Yaka eglidung duu diyà kenak sa inikagi di. Tigtu mepigtamayan i Nemula kuna amuk endà tulonen ko duu diyà kenak sa langun inikagi di diyà keniko.” ¹⁸Huenan di, tinulon i Samuwél langun diyà si Ili. Endà duen sa iglidung di. Agulé guwaen i Ili, “Kagdi si Datù Nemula, huenan di baelan di doo sumalà dé sa mepion diyà sa kehaa di.”

¹⁹Na, miglenuk Samuwél i owoy eg-unut-unut Datù Nemula i diyà kenagdi owoy pinetuu di ma sa langun inikagi i Samuwél. ²⁰Huenan di, sa langun tegeIslaél kedu diyà sa uwang tanà sa medoo tugod i Dan taman sa menuwa Bilsiba, netuuwan da sa egoh i Samuwél tigtu tegesugkow sa kagi i Datù Nemula. ²¹Takà egpehaa Datù Nemula i diyà si Samuwél dutu Silo dò kenà di anay migpehaa diyà kenagdi, enù ka egtulonen di diyà kenagdi sa ipetiig di diyà sa medoo etaw. Hê, nekedinge sa langun tegeIslaél sa tinulon i Samuwél.

Ini Sa Egoh Sa Medoo TegeIslaél Ungayà Da Dumuen Sa Hagda Datù

(1 Samuwél 8:1-9)

8 ¹Na, egoh i Samuwél lukes dé, ginelal di sa duwa anak di maama tegeantang diyà sa tanà Islaél. ²Iya sa lebi lawa anak di si Howil, owoy si Abiya sa hadi di. Kagda sa tegeantang diyà sa menuwa Bilsiba. ³Dodoo endà eg-ilingan da duu sa metudà adat sa emà da. Egpedakelan pedu da polo sa medoo pilak egkekuwa da, huenan di eglimunanan da pilak sa ketuu owoy endà ma metudà sa keantang da.

⁴Agulé nesetipon sa langun kaunutan tegeIslaél owoy mig-angay da diyà si Samuwél dutu Lama dò. ⁵Mig-ikagi da diyà kenagdi, guwaen da,

“Taa ko, lukes ka dé. Ngadan sa mebaelan ké enù ka endà eg-ilingan sa medoo anak ko duu sa adat ko? Huenan di, gelal ko dé sa etaw pedatù diyà kenami anì dumuen sa datù umuwit kenami lagà sa datù diyà sa medoo liyu balangan etaw.”

⁶Na, endà egkeiyapan i Samuwél duu sa kepegeni da datù. Huenan di, migsimbà diyà si Datù Nemula. ⁷Agulè migsagbì Datù Nemula i, guwaen di, “Pangunuti ko dé sa pinegeni sa medoo etaw diyà keniko. Enù ka beken kuna daa sa eg-ekedan da, dodoo eg-ekedan da polo aken meulu-ulu diyà kenagda. ⁸Egbaelan da ma diyà keniko ini egoh di sa éhè binaelan da diyà kenak egoh anay. Edung egoh ku mig-uwit kenagda kedu Igiptu dò, takaan da aken eg-iniyug anì egpenemulawen da polo sa medoo liyu egpenemulawen etaw. ⁹Huenan di, pangunuti ko dé sa ungayà da. Dodoo temù ko daa tulon diyà kenagda owoy selepang ko ma sa ukit-ukit baelan sa datù sumabà kenagda.”

Ini Sa Egoh I Samuwél Migtandà Si Saulo Sa Datù Da

(1 Samuwél 9:1-2,15-17; 10:1)

9 ¹Na, diyà sa umpungan tugod i Bénhamin, duen sa mapulù etaw kawasà, si Kis. Kagdi sa anak i Abiyél owoy sa bébê i Siyol owoy sa bébê lulud i Bikolat owoy sa bébê siku i Apiya. ²Na, duen sa anak i Kis, si Saulo. Nepasad dé melaud owoy tigtu mepion sa palas di. Uman pa mehagtaw diyà sa langun tegelIslaél enù ka taman da daa diyà sa pelula di, owoy uman pa sa hagdi ketolol diyà kenagda langun.

9:3-14 Na, si Saulo sa sinugù sa emà di anì lagbeten di sa duma hinagtay da asnu netelas. Egoh di egtemù eglagbet, nekeangay diyà sa menuwa Lama kenà i Samuwél eg-ugpà.

¹⁵Na, agdaw simag sa egoh i Saulo tumbow diyà Lama, inikagiyan i Datù Nemula Samuwél i. ¹⁶Guwaen di, “Simag éhè ini mendaa sa ulas, peangayen ku diyà keniko sa etaw kedu diyà sa umpungan tugod i Bénhamin. Hududi ko lana sa ulu di anì metandaan ko kagdi sa kumedatù diyà sa medoo etaw ku tegelIslaél. Alukan di kagda kedu diyà sa medoo tegePilistiya kuntelà da, enù ka hinaa ku sa lihay sa medoo etaw ku owoy dinineg ku ma sa kepegeni da tabang.”

¹⁷Agulè egoh di sumimag egoh i Samuwél mighaa si Saulo, mig-ikagi Datù Nemula i diyà kenagdi, guwaen di, “Ini sa maama tinulon ku diyà keniko. Kagdi sa kumedatù diyà sa medoo etaw ku.”

10 ¹Agulè kinuwa i Samuwél sa butul nepenù lana owoy hinududan di sa ulu i Saulo owoy pinengadekan di. Guwaen di, “Egpehududan i Datù Nemula lana sa ulu ko enù ka kuna sa kumedatù diyà siini tanà Islaél anì pedatù ka diyà siini medoo etaw hinemilì di owoy anì alukan ko ma kagda kedu diyà sa medoo kuntelà da.”

Ini Sa Egoh I Samuwél Migsigbolow Si Saulo

(1 Samuwél 13:1-14)

13 ¹Na, egoh i Saulo nelugay dé datù diyà sa tanà Islaél, ²hinemilì di sa telu ngibu sundalu diyà sa medoo mebagel maama tugod i Islaél. Pineunut di sa duwa ngibu sundalu diyà kenagdi diyà sa menuwa Mikmas owoy sa getan-getan diyà sa uwang tanà Bétél. Owoy pineangay di ma sa sengibu sundalu diyà sa anak di, si Honatan, dutu menuwa Gabaun dò diyà sa uwang tanà sa medoo tugod i Bénhamin. Agulé sa medoo maama endà hinemilì di duu, pinepelikù di kagda.

³Agulé pinengayaw i Honatan sa medoo tegePilistiya migpetigdeg kemalig diyà Gabaa.^c Hê, nekedineg sa medoo tegePilistiya sa lalag di. Agulé igpesugkow i Saulo iya wé diyà sa langun tegelIslaél owoy tinegbuliyàn di ma sa medoo etaw anì sebuligan da gumila sa medoo tegePilistiya. ⁴Na, netiigan sa medoo tegeIslaél inatuwan i Saulo sa segeumpung tegePilistiya owoy netiigan da ma egkelepuhan sa medoo tegePilistiya kagda. Huenan di, igsasà i Saulo kagda anì mesetipon da diyà kenagdi dutu Gilgal dò anì sebuligan da gumila.

⁵Nesetipon ma sa medoo tegePilistiya anì umatu da gumila diyà sa medoo tegelIslaél. Duen sa telu lagsà^d kalitun da atung eggamiten da eggila, owoy enem ngibu sa kedoo sundalu da egkudà, owoy endà mebilang sa kedoo sundalu da eg-ipanaw tanà enù ka lagà da sa kedoo enay mantadan. Mig-angay da migpetigdeg kemalig diyà sa menuwa Mikmas denu tebowon agdaw amuk diyà ki sa menuwa Bét-Aben.

⁶Agulé netiigan sa medoo tegeIslaél mepasangan da danà di kulang sa egkegaga da umatu. Huenan di, miglidung da sumalà dé sa kenà da, duen miglidung diyà takub, duen ma diyà sa tosong diyà tanà, duen ma diyà sa kenà sa medoo dakel batu, duen ma diyà sa tapay kenà lebung, owoy duen ma dalem sa paligì endà duen wayeg di. ⁷Owoy duen ma sa migbatas sa lawa't wayeg Holdan enù ka mig-angay da diyà sa uwang tanà sa medoo tugod i Gad owoy sa tanà Galaad.

Dodoo si Saulo owoy sa medoo duma sundalu di, mig-ugpà da pelawà dutu Gilgal dò, apiya di pa eglukub da egtigkel sa kekelimedang da.

⁸Pitu agdaw sa lugay i Saulo eg-angat-angat, enù ka iya sa atas tinulon i Samuwél diyà kenagdi. Dodoo egoh di neuma sa kepitu di agdaw, neangga sa ketebow i Samuwél. Huenan di, egketagakan sa medoo etaw di Saulo i. ⁹Agulé migsugù Saulo i anì meuwit diyà kenagdi sa medoo hinagtay ulowen da ibegay da diyà si Nemula owoy sa medoo hinagtay

^c 13:3 Mebaluy ma guwaen di, “owoy inimatayan di sa ulu-ulu sundalu tegePilistiya.”

^d 13:5 Mebaluy ma guwaen di telu ngibu sa kedoo kalitun da.

ma imatayan da anì metandaan sa egoh da nesesebaen si Nemula. Egoh da mig-uwit dé, eg-ulowen di sa duma hinagtay. ¹⁰Hê, egoh di neubus dé, iya pelawà sa egoh i Samuwél migtebow. Agulé mig-angay Saulo i egtelabuk kenagdi enù ka saluan di.

¹¹Dodoo inigsaan i Samuwél, guwaen di, “Maen di ya binaelan ko iya wé?”

Migsagbi Saulo i, guwaen di, “Binaelan ku iya wé enù ka egsalidan a sa medoo duma ku. Owoy endà panay ka migtebow apiya di pa neuma dé sa atas ta mig-imatay sa hinagtay ibegay ta diyà si Nemula. Owoy medapag ma dé sa medoo tegePilistiya diyà kenita diyà sa menuwa Mikmas.

¹²Pinenemdem ku pengayawen sa medoo tegePilistiya kami diyà Gilgal ligò di endà pa neulow ta duu sa hinagtay ibegay ta diyà si Datù Nemula. Huenan di, netegelan a dé eg-ulow sa hinagtay ibegay diyà si Nemula.”

¹³Agulé mig-ikagi Samuwél i, guwaen di, “Tigtu ka ngahàngahà danà iya wé binaelan ko, enù ka endà egpangunutan ko duu sa igsugù i Datù Nemula diyà keniko. Amuk pangunutan ko hedem sa uledin di, mebaluy kumedatù sa medoo tugod ko diyà sa tanà Islaél taman melugay. ¹⁴Dodoo mekedan dé sa kedatuan ko danà iya wé binaelan ko. Na, danà ko endà egpangunut diyà sa igsugù di, hemilien i Datù Nemula polo sa sebaen ma maama anì kagdi sa kumedatù diyà sa tanà Islaél owoy tigtu metuuwan ma diyà sa etaw hemilien di.”

Ini Sa Egoh I Nemula Migkedan Sa Kedatuan I Saulo

(1 Samuwél 15:1-23)

15 ¹Na sebaen agdaw, mig-ikagi dema Samuwél i diyà si Saulo, guwaen di, “Aken sa sinugù i Datù Nemula eghudud lana anì egtandaan ku kuna sa kumedatù diyà sa medoo tegeIslaél. Na, dinegdineg ko sa inikagi i Datù Nemula épê dakek egkegaga. ²Ini sa kagi di igsugkow ku diyà keniko, tigtu pigtamayan di gaa sa medoo tegeAmalék enù ka ginila sa medoo tupù da sa medoo tegeIslaél egoh da mig-ipanaw kedu Igiptu dò egoh anay. ³Huenan di, angay ko gila sa medoo tegeAmalék. Imet ko kagda imatayi. Pedaeti ko ma sa medoo langun taman da anì endà duen sa mesamà. Imatayi ko kagda langun, bayi owoy maama, lukes etaw taman sa batà egsusu pelawà, lapeg sa langun hinagtay da ma.”

⁴Huenan di, sinetipon i Saulo sa medoo sundalu tegeIslaél diyà sa menuwa Télim. Egoh di mig-esà kenagda, duen duwa latuh ngibu sundalu tegeIslaél owoy duen ma salagsà sundalu kedu diyà sa tanà Huda. ⁵Agulé mig-angay Saulo i owoy sa medoo etaw di diyà sa menuwa tegeAmalék. Mig-esud da diyà sa baug medapag dahiya enù ka melaeb da. ⁶Dodoo muna migpeuwit kagi Saulo i diyà sa medoo etaw tegeKenihe nekeamut diyà sa medoo tegeAmalék anì melaguy da. Guwaen di diyà kenagda,

“Pedi yù yu dé diyà sa medoo tege Amalék, anì endà mekelapeg yu diyà kenagda amuk imatayan ku kagda, enù ka hiniduan sa tupù yu sa medoo tege Islaél egoh da mig-ipanaw kedu Igipçu dò egoh anay.” Na, egoh sa medoo tege Kenih migdineg iya wé, medelamet da miglegkà.

⁷Agulé eggilawen da i Saulo sa medoo tege Amalék kedu diyà Habila taman mekeuma da diyà sa tanà Sul denu tebowon agdaw amuk diyà ki Igipçu. ⁸Sinigkem da sa datù tege Amalék, si Agag, owoy inimatayan di ma sa langun etaw di. ⁹Dodoo endà imatayan da duu Agag i, owoy endà ma imatayan da duu sa mepion sapì owoy kebilibili owoy sa medoo liyu hinagtay megebù. Iya daa sa inimatayan da sa medoo endà mepion di.

¹⁰Agulé mig-ikagi Datù Nemula i diyà si Samuwél, ¹¹guwaen di, “Nesenulê a sa egoh ku mighemilì si Saulo sa datù da, enù ka ininiyugan di aken. Endà egpangunutan di duu sa igsugù ku kenagdi.” Na, egoh i Samuwél migdineg iya wé, migbulit owoy neelut sigep sa kepehiduhidu di diyà si Datù Nemula denu si Saulo. ¹²Agulé egoh di sumimag, miglapus Samuwél i eg-angay diyà si Saulo. Dodoo endà mapes da mesehaa enù ka mig-angay polo Saulo i diyà sa menuwa Kalmél kenà di migbael sa inetaw tandà sa hagdi kepionon, agulé miglagbas dutu menuwa Gilgal dò. ¹³Hê, linohot i Samuwél Saulo i. Agulé egoh i Saulo mighaa kenagdi, sinaluan di, guwaen di, “Metabangan i Datù Nemula kuna, enù ka pinangunutan ku dé sa medoo igsugù i Datù Nemula diyà kenak.”

¹⁴Dodoo mig-igsà Samuwél i, guwaen di, “Amuk hediya, maen di ya atu egdinegen ku kagi sa medoo kebilibili owoy kagi sa medoo sapì?”

¹⁵Migsagbì Saulo i, guwaen di, “Iya sa nekuwa sa medoo sundalu ku diyà sa medoo tege Amalék. Kinuwa da sa langun mepion kebilibili owoy sapì anì imatayan da ibegay da diyà si Datù Nemula sa egpigtuuwen ko. Dodoo inimatayan ké imet sa langun endà iseg di mepion.”

¹⁶Mig-ikagi Samuwél i, guwaen di, “Enget dé. Na, dinegdineg ko sa inikagi i Datù Nemula diyà kenak egoh sigep.”

Agulé guwaen i Saulo, “Tuloni ko aken.”

¹⁷Mig-ikagi Samuwél i, guwaen di, “Egoh anay, iya sa penemdem ko lagdà etaw ka. Dodoo ini egoh di kuna sa tigtu ulu-ulu sa medoo tege Islaél, enù ka hinemilì i Datù Nemula kuna owoy pinehududan di lana sa ulu ko anì metandaan kuna sa kumedatù diyà sa medoo tege Islaél. ¹⁸Sinugù di kuna anì imatayan yu imet sa medoo tege Amalék enù ka medaet sa binaelan da diyà sa kehaa i Nemula. Huenan di, igsugù di igpegila anì imeten yu kagda mimatay. ¹⁹Maen di ya atu, endà migpangunut ka diyà sa igsugù di keniko? Ngadan sa pesuwan di migtelam-am yu egkuwa sa langun taman da? Dakel salà diyà si Datù Nemula iya wé binaelan yu.”

²⁰Migsagbì Saulo i, guwaen di, “Migpangunut a doo diyà si Datù Nemula, enù ka mig-angay a doo diyà sa pineangayan di kenak. Sinigkem

ku Agag i sa datù tegeAmalék owoy inimatayan ku imet sa medoo liyu tegeAmalék. ²¹Dodoo hinemilì sa medoo etaw ku sa tigtu mepion kebilibili owoy sapì anì endà ilapeg da duu eg-imatay, enù ka inuwit da polo dahini diyà Gilgal anì imatayan da ibegay diyà si Datù Nemula sa egpigtuuwen ko.”

²²Agulè mig-ikagi Samuwél i, guwaen di, “Taa ko. Ngadan tayu sa tigtu egkeiyapan i Datù Nemula, iling ka sa medoo hinagtay ulowen ta ibegay ta diyà kenagdi ataw ka sa kepangunut ta sa igsugù di? Tuu doo, uman pa mapulù diyà kenagdi sa kepangunut ta. Mepion doo sa kebael ta amuk ulowen ta sa kebilibili lapeg sa tabà di ibegay ta diyà si Datù Nemula amuk sumimbà ki. Dodoo uman pa mepion sa kepangunut ta diyà sa inikagi di. ²³Enù ka sa ketipay etaw diyà kenagdi, lagà mendaa sa salà sa etaw egpegeni diyà sa busaw. Owoy lagà mendaa kepenemula inetaw sa kepedakeldakel. Na, danà ko mig-eked sa igsugù i Datù Nemula diyà keniko, huenan di kinedanan di dé sa kedatuan ko diyà sa medoo etaw di.”

Ini Sa Egoh I Dabid Hinududan I Samuwél Lana Anì Kumedatù

(1 Samuwél 16:1-13)

16 ¹Na, nelugay nebukul Samuwél i danà sa nebaelan i Saulo. Agulè mig-ikagi Datù Nemula i diyà si Samuwél, guwaen di, “Yaka dé egkebukul la danà ku egkedan sa kedatù i Saulo diyà sa medoo tegelslaél. Dodoo penù ko lana sa taguan ko owoy uwit ko ma angay diyà si Hési dutu Bétlihém dò, enù ka hinemilì ku dé sa sebaen anak di anì kumedatù.”

²Mig-igsà Samuwél i, guwaen di, “Ngadan sa ukit keangay ku dutu? Enù ka imatayan i Saulo doo aken amuk metiigan di sa keangay ku dutu.”

Migsagbì Datù Nemula i, guwaen di, “Uwit ko sa nati sapì, owoy ikagi ko sa keangay ko dutu anì mimatay ka hinagtay ibegay ko diyà si Nemula. ³Amuk tumbow ka dutu, pelenged ko Hési i diyà sa egoh ko mimatay hinagtay. Ipetiig ku ma diyà keniko sa baelan ko dutu owoy sa etaw hududan ko lana.”

⁴Hê, pinangunutan i Samuwél sa igsugù i Datù Nemula diyà kenagdi, owoy mig-angay dutu Bétlihém dò. Egoh di migtebow, migtelabuk sa medoo ulu-ulu tegeBétlihém diyà kenagdi. Eglukub da eg-igsà, guwaen da, “Ngadan sa pesuwan ko mig-angay dahini, anì upionen ko kami?”

⁵Migsagbì Samuwél i, guwaen di, “Hoò, mig-angay a dahini anì ulowen ku sa hinagtay ibegay ku diyà si Datù Nemula. Huenan di, pelanih yu dé diyà sa kehaa di anì lumenged yu siini baelan ku.” Sinasà di ma Hési i owoy sa medoo anak di maama anì pelanihen da ma kagda enù ka egpelengeden di ma kagda sa keimatay di hinagtay ibegay di diyà si Nemula.

⁶Na, egoh da i Hési migtebow, hinaa i Samuwél Iliyab i sa lebi lawa anak i Hési. Iya sa penemdem i Samuwél kagdi dé sa maama hinemili i Datù Nemula anì kumedatù. ⁷Dodoo mig-ikagi Datù Nemula i diyà si Samuwél, guwaen di, “Yaka egpenemdem duu sa mepion palas di owoy sa kehagtaw di. Beken kagdi sa hinemili ku, enù ka beken sa palas etaw sa egpenemdemen ku, enù ka endà iling a keniyu eghaa diyà sa palas etaw daa. Eghaa yu daa diyà sa palas sa lawa etaw. Dodoo aken, sa pedu di polo sa eghahauwen ku.”

⁸Agulé inumow i Hési sa anak di si Abinadab anì sumetugdug umukit diyà sa taengan i Samuwél. Dodoo mig-ikagi Samuwél i, guwaen di, “Beken ma kagdi sa hinemili i Datù Nemula.” ⁹Agulé pineukit i Hési sa anak di si Samah diyà sa taengan i Samuwél, dodoo hediya ma sa inikagi i Samuwél, guwaen di, “Beken ma kagdi sa hinemili i Datù Nemula.” ¹⁰Anan hediya sa binaelan i Hési diyà sa pitu muna anak di maama diyà sa taengan i Samuwél, dodoo endà duen sa hinemili i Datù Nemula diyà kenagda. ¹¹Agulé inigsaan i Samuwél Hési i, guwaen di, “Enù di ya, duen pa sa liyu anak ko maama?”

Migsagbi Hési i, guwaen di, “Duen pa sa kenohonon anak ké, dodoo kagdi sa eg-ipat sa medoo kebilibili ké.”

Mig-ikagi Samuwél i, guwaen di, “Mepion amuk peangayi ko dé, enù ka endà pelawà mimatay ki sa hinagtay ibegay ta diyà si Nemula taman endà tumebow di dahini.” ¹²Agulé igpeangay i Hési sa kenohonon anak di. Mepion sa palas di owoy megebù ma owoy buyu dé egkepasad melaud. Hê, mig-ikagi Datù Nemula i diyà si Samuwél, guwaen di, “Kagdi sa hinemili ku, huenan di hududi ko dé lana.”

¹³Agulé kinuwa i Samuwél sa tinaguan di lana, owoy hinududan di sa ulu i Dabid diyà sa taengan sa medoo kakay di. Na, edung egoh iya, linuhub sa Suguy i Datù Nemula Dabid i anì tunungan. Hê, miglikù dé Samuwél i dutu Lama dò.

Ini Sa Egoh I Gulayat Mig-enggat Sa Medoo TegeIslaél

17 ¹Na, nesetipon sa medoo tegePilistiya diyà sa menuwa Suko diyà sa tanà Huda anì gilawen da sa medoo tegeIslaél. Migpetigdeg da sa medoo kemalig diyà Ipes-Dammin neseteliwadaan sa menuwa Suko owoy menuwa Asikah. ²Na, si Saulo owoy sa medoo sundalu di, nesetipon da ma migpetigdeg kemalig diyà sa sugud Éla nesetanà dutu da sa medoo tegePilistiya. ³Egkesesugpayal da doo sa medoo tegePilistiya owoy sa medoo tegeIslaél, enù ka diyà sa sebaen getan sa medoo tegePilistiya owoy diyà sa sebaen ma getan sa medoo tegeIslaél, owoy duen ma sa sugud di teliwadà.

⁴Na, egketuuwan sa medoo tegePilistiya diyà sa duma da sundalu si Gulayat kedu menuwa Gat, enù ka mebalaw sundalu owoy telu kamitelu

sa kehagtaw di egtigdeg. ⁵Duen sa sayap di galang, owoy lima pulù owoy pitu kakilu sa kebegat sa anit di galang. ⁶Owoy galang ma sa ampis sa lisen di, owoy sinegelay di ma sa gelat di galang. ⁷Duen ma sa sigpù di nekeuma pitu kakilu sa kebegat sa ebà di owoy dakel sa degdegan di éhê kedakel bugsud. Duen ma sa sebaen sundalu eghuna diyà kenagdi sa atung eg-uwit sa kelasag di.

⁸Na, egtigdeg Gulayat i owoy eg-umow diyà sa medoo sundalu tegeIslaél, guwaen di, “Endà duen sa pesuwan ta langun egsegilaway. Hemili yu daa sa sebaen etaw diyà keniyu anì telabuken di aken anì seginaluway ké enù ka aken sa tegePilistiya owoy anan yu etaw i Saulo. ⁹Amuk mesebalà ké owoy amuk meimatayan di aken, peudipen ké langun diyà keniyu. Dodoo amuk kagdi sa meimatayan ku, udipenen ké ma kiyu langun. ¹⁰Eg-enggaten ku kiyu i medoo tegeIslaél ini egoh di. Hemili yu dé sa etaw diyà keniyu anì sebalaay ké.” ¹¹Na, egoh i Saulo owoy sa medoo tegeIslaél migdineg sa inikagi i Gulayat, nelimedangan da temù.

Ini Denu Si Dabid Owoy Si Gulayat

¹²Na, si Dabid sa kenohonon anak i Hési tegeBétlihém pinengadanan da ma menuwa Épelat diyà sa tanà Huda. Duen sa walu anak i Hési maama, owoy tigtu dé lukes Hési i egoh i Saulo egpedatù. ¹³Telu sa anak i Hési nekeunut diyà sa medoo sundalu i Saulo eg-angay eggila. Iya sa ngadan da si Iliyab sa lebi lawa di owoy si Abinadab sa keduwa di owoy si Samah sa ketelu di. ¹⁴Nekeugpà da diyà sa kenà i Saulo, enù ka eg-unut-unut da diyà sa kegila. Dodoo si Dabid sa kenohonon anak di, ¹⁵takà egpelikùlikù eg-angay diyà sa kenà i Saulo owoy diyà sa menuwa Bétlihém kenà di eg-ipat sa medoo kebilibili sa emà di.

¹⁶Na, uman magtu kesimag owoy uman mahapun taman epat pulù agdaw, takaan i Gulayat eg-enggat sa medoo tegeIslaél.

¹⁷Na, sebaen agdaw sinugù i Hési Dabid i, guwaen di, “Hatedi ko siini sepulù owoy walu kakilu teligo sinelal owoy sa sepulù getibulu epan owoy petéél ka angay diyà sa telu kakay ko dutu siedò kenà da eggila. ¹⁸Uwit ko ma siini sepulù gebekut natek gatas owoy begayi ko diyà sa ulu-ulu sundalu. Hahaa ko ma sa keugpà sa medoo kakay ko, enù ka amuk pelikù ka dini uwit ko sumalà dé sa ibegay da anì metandaan sa egoh da endà memasangan. ¹⁹Dutu da sugud Éla dò enù ka eg-unut-unut da diyà si Saulo owoy sa medoo sundalu tegeIslaél eggila diyà sa medoo tegePilistiya.”

²⁰Agulé egoh di sumimag, miglapus Dabid i mig-enaw owoy igpeipat di sa medoo kebilibili da diyà sa sebaen ma tegeipat kebilibili. Hê, mig-ipanaw dé eg-angay diyà sa kenà da egsegilaway owoy inuwit di sa kaenen igpehated sa emà di diyà kenagdi. Egoh di migtebow, eg-angay

dema eggila sa medoo tegeIslaél owoy eglukiyang da ma. ²¹Agulé eg-ingat sa medoo sundalu tegeIslaél diyà sa kenà da egtigdeg, owoy hediya ma sa medoo tegePilistiya anì segilaway da. ²²Agulé tinangtang i Dabid sa kaenen inuwit di diyà sa tegebantay sangkap, enù ka migletu eglagbas diyà sa kenà sa medoo sundalu nesetipon anì saluan di sa medoo kakay di. ²³Egoh da telibubu egseolomoy, mig-angay dema Gulayat i tegeGat egtigdeg diyà sa taengan sa medoo duma di tegePilistiya owoy eg-enggaten di dema sa medoo tegeIslaél. Hê, dinineg i Dabid sa keenggat di. ²⁴Na, egoh sa medoo tegesIslaél mighaa dema si Gulayat, migpelaguy da langun enù ka nelimedangan da temù. ²⁵Egseikagiyay da, guwaen da, “Aba! Kaiya dema sa tegepelobolobo takà eg-enggat kenita uman agdaw. Amuk duen sa etaw mekeimatay kenagdi, duen gaa sa dakel untung mesakem di diyà si Datù Saulo, owoy ipesawa di ma gaa sa anak di kenogon, owoy endà ma dé mekebayad sa malayan di sa pelesintu eg-etuken sa gubilenu.”

²⁶Na, egoh i Dabid migdineg iya wé, eg-igsà diyà sa medoo etaw medapag diyà kenagdi. Guwaen di, “Ngadan gaa sa mesakem sa etaw mekeimatay siedò tegePilistiya endà egpigtuu diyà si Nemula anì mekedan siini mekemala diyà sa tanà Islaél? Ngadan iya wé etaw tegepelobolobo takà eg-enggat sa medoo sundalu i Nemula, sa Nemula nehagtay?”

²⁷Migsagbì sa medoo duma di egseolomoy, guwaen da, “Lagà doo sa dinineg ko daeddò é sa mekebegay diyà sa etaw mekeimatay siedò tegePilistiya.”

²⁸Na, dinineg i Iliyab tigtu kakay i Dabid sa keigsà di takà diyà sa medoo etaw. Huenan di, binulitan di Dabid i, guwaen di, “Maen di ya mig-angay ka dini? Ngadan di etaw sa sinaligan ko sa medoo kebilibili ko dutu siedò melabel tanà mediyù dalesan? Netiigan ku egpeolòlò ka daa owoy medaet sa pedu ko, huenan di mig-angay ka dini anì hauwen ko daa sa kegila.”

²⁹Migsagbì Dabid i, guwaen di, “Ngadan sa binaelan ku, atu, enù ka eg-igsà a ma daa?” ³⁰Agulé mig-iniyug diyà si Iliyab, owoy mig-igsà dema diyà sa sebaen ma etaw. Dodoo uman etaw eg-igsaan di, nesetepeng doo sa sagbì da diyà sa sagbì sa anay inigsaan di.

³¹Na, dinineg sa medoo etaw sa keigsà i Dabid, agulé duen sa migtulon diyà si Saulo. Hê, igpeangay i Saulo Dabid i. ³²Agulé mig-ikagi Dabid i diyà si Saulo, guwaen di, “O Datù, mepion amuk endà mebukul ki danà siedò tegePilistiya. Enù ka aken sa egsugùsuguen ko mangay mimatay kenagdi.”

³³“Endà,” guwaen i Saulo. “Endà mekegaga ka umatu diyà siedò tegePilistiya, enù ka batà ka pelawà owoy kagdi sa mebalaw sundalu edung egoh di batàbatà pelawà.”

³⁴Dodoo endà netepelan Dabid i. Huenan di, mig-ikagi, guwaen di, “O Datù, aken sa tegeipat sa medoo kebilibili sa emà ku. Amuk tumbow sa liyun ataw ka sa oso owoy amuk kuwaen di sa sebaen kebilibili ké,
³⁵lohote ku doo malbal enù ka alukan ku sa kebilibili kinuwa di. Amuk isaluwan di aken, esoen ku sa bekeleng di owoy imatayan ku. ³⁶Tuu doo, inimatayan ku dé sa liyun owoy sa oso. Hediya ma sa baelan ku diyà siedò tegePilistiya endà egpigtuu diyà si Nemula, enù ka takaan di egpelobolobowon sa medoo sundalu i Nemula, sa Nemula nehagtay.
³⁷Inalukan i Datù Nemula aken kedu diyà sa egkegaga sa liyun owoy sa oso, huenan di kagdi dema sa umaluk kenak kedu diyà sa egkegaga siini tegePilistiya.”

Hê, guwaen i Saulo, “Na, angay ka dé diyà sa kuntelà ta owoy metabangan ka doo i Datù Nemula.” ³⁸Agulé igpekawal di diyà si Dabid sa hagdi ginis atung eggamiten di eggila owoy sa sayap di galang owoy sa anit di ma. ³⁹Agulé igseliket i Dabid sa sundang i Saulo, owoy egtukaw egbigkat. Dodoo endà egkebingbing di duu enù ka endà nelayam di. Agulé guwaen di diyà si Saulo, “Endà mekegaga a ini i, enù ka endà nelayaman ku duu.” Huenan di, linengà i Dabid iya wé. ⁴⁰Agulé kinuwa di sa tuked di owoy mig-angay eghudut sa lima tukééy batu melanih diyà sa lawa't wayeg, owoy ig-awuh di diyà sa puyut di. Ligò di egsabà sa éhê palas pitik di, mig-angay egtelabuk diyà si Gulayat.

Ini Sa Egeh I Gulayat Tinabanan I Dabid

(1 Samuwél 17:41-54)

⁴¹Na, eg-angay ma Gulayat i egsiegun diyà si Dabid, owoy eghuna diyà si Gulayat sa atung tegeuwit sa kelasag di. ⁴²Egeh di mig-inengteng si Dabid, eg-alumen di enù ka batà daa owoy metolol ma sa palas di.
⁴³Mig-ikagi Gulayat i, guwaen di, “Ngadan sa kehaa ko kenak, tuyang a daa? Maen di ya balbal daa sa egsabaan ko?” Agulé tinubad di Dabid i danà sa medoo egpenemulawen di. ⁴⁴Inenggat di ma, guwaen di, “Na, téél ka dé angay ka dini enù ka ipekaen ku kuna diyà sa medoo manuk owoy sa medoo uled tanà.”

⁴⁵Migsagbi Dabid i, guwaen di, “Eg-angayen ko aken eggila danà ko egsalig diyà sa sundang owoy sigpù owoy gelat. Dodoo si Datù Nemula épê dakel egkegaga polo sa naken egsaligan amuk eg-angayen ku kuna eggila. Kagdi sa Nemula egpigtuuwen sa medoo tegeIslaél sa takaan ko egpeumàumaan. ⁴⁶Ini egeh di ibegay di dé kuna diyà kenak. Tabanan ku kuna owoy tagpeden ku sa ulu ko. Owoy ipekaen ku ma kuna lapeg sa medoo duma ko diyà sa medoo manuk owoy sa medoo uled tanà ma. Huenan di, metiigan sa langun etaw duen sa Nemula épê dakel egkegaga egtabang sa medoo tegeIslaél. ⁴⁷Owoy metiigan doo sa langun etaw

dahini mekegaga Datù Nemula i umaluk sa medoo etaw di, apiya di pa endà pineukit di diyà sa sundang owoy sigpù. Kagdi sa tumaban amuk gumila sa etaw di, owoy ipelugpì di doo kiyu diyà kenami ini egoh di.”

⁴⁸Agulé mig-uman Gulayat i eg-angay egdapag diyà si Dabid, owoy migletu ma Dabid i anì mesetelabuk da. ⁴⁹Eg-esoen di sa batu dalem sa puyut di owoy inasadan di sa éhê palas pitik di. Hê, pinitik di Gulayat i. Nokesugat diyà sa kilay di owoy nekelebeng ma sa batu. Hê, nekelagkeb Gulayat i. ⁵⁰Na, tinabanan i Dabid Gulayat i danà sa pitik daa, owoy neimatayan di ma apiya di pa endà duen sundang di. ⁵¹Hê, migletu Dabid i eg-angay eg-utas si Gulayat. Migtigdeg diyà sa dapag di owoy hinugut di sa sundang i Gulayat, agulé tinagped di sa ulu di.

Na, egoh sa medoo tegePilistiya mighaa nematay dé Gulayat i sa egsaligan da, migpelaguy da langun. ⁵²Agulé migpetibos sa medoo tegeIslaél owoy sa medoo tegeHuda, owoy linohot da ma sa medoo tegePilistiya taman nekeuma da diyà sa menuwa Gat owoy taman sa bengawan sa kutà menuwa Ikelon. Minetelagtag sa medoo tegePilistiya inimatayan da diyà sa dalan eg-angay Salaim dò taman sa menuwa Gat owoy menuwa Ikelon. ⁵³Na, egoh sa medoo tegeIslaél neubus dé miglohot sa medoo tegePilistiya, migpelikù da owoy eg-atulen da sa langun taman diyà sa kenà sa medoo tegePilistiya miglawi. ⁵⁴Agulé ighated i Dabid sa ulu i Gulayat dutu menuwa Hélusalém dò, dodoo inuwit di sa medoo kinemkem i Gulayat egoh di miglikù.

Ini Sa Egoh I Saulo Minesina Diyà Si Dabid

(1 Samuwél 18:1-16)

18 ^{1b}Na, edung egoh iya, tigtu eghiduwan i Honatan anak i Saulo Dabid i. Tuu doo, lagà mendaa sa kehidu di sa hagdi lawa sa kehidu di si Dabid. ²Edung egoh iya ma, egpeunut-unuten i Saulo Dabid i diyà kenagdi, owoy endà ma egpelikuen di duu. ³Na, danà sa dakel kehidu i Honatan si Dabid, pinasadan di seloyukay da taman melugay. ⁴Huenan di, igbegay di diyà si Dabid sa kawal di metolol owoy sa medoo eggamiten di amuk eggila, lapeg sa sundang di owoy sa busug owoy sa sabitan di.

⁵Na, takà egtaban Dabid i sumalà dé sa kenà i Saulo egpegila kenagdi. Huenan di, ginelal i Saulo kagdi ulu-ulu diyà sa medoo sundalu di. Tigtu neiyap sa langun etaw iya wé kinegelal di si Dabid, iling ka sa medoo etaw épê gelal ataw ka sa medoo endà duen gelal.

⁶Na, egoh i Dabid ubus dé mig-imatay si Gulayat, miglikù da Datù Saulo i owoy sa medoo sundalu di. Ligò da eg-ipanaw, sumalà dé sa menuwa eg-ukitan da, tinelabuk da Saulo i sa medoo bayi kedu diyà sa menuwa. Egduyuy da eg-olò owoy egdelayaw da ma owoy duen ma

sa dalemetan da. ⁷Ligò da egdelayaw, egduyuy da, guwaen da, “Ngibu-ngibuwan sa etaw inimatayan i Datù Saulo, dodoo lagsàlagsaan sa inimatayan i Dabid.”

⁸Na, egoh i Saulo migdineg iya wé, tigtu migbulit enù ka nesina. Guwaen di, “Lagsàlagsaan gaa sa inimatayan i Dabid, dodoo ngibu-ngibuwan daa polo sa naken. Amuk hediya, mepeka di sa kedatuan ku kani.” ⁹Huenan di, edung egoh iya, takaan di Dabid i eghahaa danà sa dakel kekesina di.

¹⁰Na, egoh di sumimag, petow dé linuhub busaw Saulo i enù ka egpandayaen i Nemula dé owoy migkelengleng ligò i Dabid telibubu egkebit sa alpa di, enù ka iya sa egbaelan di takà anì kumepion sa pedu i Saulo. Na egoh iya, eg-sabaan i Saulo sa sigpù di. ¹¹Hê, duwa gulê linawag di sigpù Dabid i anì mematay, dodoo anan neketilò.

¹²Na, nelimedangan Saulo i diyà si Dabid, enù ka netiigan di beken dé kagdi sa eg-ipaten i Datù Nemula, enù ka si Dabid dé polo. ¹³Huenan di, pineangay di Dabid i dutu mediyù dò, owoy pineulu-ulu di kagdi diyà sa sengibu sundalu. Takaan i Dabid kagda eg-uwit amuk mangay da gumila. ¹⁴Sumalà dé sa angayan da gumila, tumaban da doo enù ka takà eg-unut-unut Datù Nemula i diyà si Dabid. ¹⁵Huenan di, egoh i Saulo mighaa sa egkegaga i Dabid, mig-uman sa kekelimedang di. ¹⁶Dodoo sa langun etaw tegeIslaél owoy tegeHuda ma, eghiduwan da Dabid i enù ka takà egtaban diyà sa medoo kuntelà da.

Ini Sa Egoh I Dabid Endà Eg-imatay Si Saulo

(1 Samuwél 24:1-7)

24 ¹Na, sebaen agdaw egoh i Saulo miglikù egoh di neubus eggila diyà sa medoo tegePilistiya, duen etaw migtulon diyà kenagdi, guwaen da, “Dutu siedò melabel tanà Énggadi mediyù dalesan Dabid i.” ²Huenan di, hinemilì i Saulo sa telu ngibu tigtu mebagel sundalu diyà sa medoo tegeIslaél owoy inangay da eglagbet Dabid i diyà sa tanà pinengadanan da Kebatuwan Ugpaan Kambing.

³Egoh da i Saulo eg-ipanaw, mig-ukit da diyà sa dapag ebà takub medapag diyà sa lugenan kebibili. Hê, mig-awuh Saulo i dahiya enù ka egleputan. Dodoo endà netiigan di duu dahiya ma Dabid i miglidung owoy sa medoo etaw di dalem iya wé takub. ⁴Mig-ikagi da diyà si Dabid, guwaen da, “Ini dé sa agdaw inikagi i Datù Nemula diyà keniko sa egoh di megay diyà keniko sa kuntelà ko anì baelan ko diyà kenagdi sumalà dé sa egkeiyapan ko.” Agulé migpeanag-anag Dabid i egdapag diyà si Saulo. Hê, pinisang di sa pelingping ginis di dodoo endà netiigan i Saulo duu.

⁵Agulé nebukul sa pedu i Dabid danà di migpisang sa ginis i Saulo. ⁶Huenan di, inikagiyan di sa medoo etaw di, guwaen di, “Endà meiyap

Datù Nemula i amuk medaet sa kebael ku sa datù ku hinemilì di. Endà mael a sa medaet diyà kenagdi enù ka ginelal i Datù Nemula ma kagdi datù.” 7Na, danà iya wé inikagi di, hinawidan i Dabid sa medoo etaw di egkelukuy egbael medaet diyà si Saulo. Huenan di, pinandayà da sa kelagbas keipanaw i Saulo.

Ini Sa Egoh I Saulo Nematay

(1 Samuwél 31:1-7)

31 1Na, ginila sa medoo tegePilistiya dema sa medoo tegeIslaél diyà sa getan Gilbowa. Medoo sa tegeIslaél nematay dahiya owoy migpelaguy sa medoo duma da, lapeg si Saulo owoy sa medoo anak di maama. 2Dodoo linohot sa medoo tegePilistiya kagda owoy inimatayan da sa telu anak i Saulo maama, si Honatan owoy si Abinadab owoy si Malkisuwa. 3Agulé nedapagan sa medoo kuntelà Saulo i. Hê, nesugat pinanà da owoy neamelan.

4Agulé mig-ikagi Saulo i diyà sa atung tegeuwit sa langun taman di eggila, guwaen di, “Hugut ko sa sundang ko. Utasi ko dé aken, enù ka endà meiyap a amuk sa medoo tegePilistiya endà egpigtuu diyà si Nemula sa meumàumà kenak owoy sa umutasan kenaken.” Dodoo mig-eked sa egsugùsuguen di eg-utas kenagdi enù ka egkelimedangan. Huenan di, kinuwa i Saulo sa hagdi sundang owoy kininagpaan di. 5Na, egoh sa egsugùsuguen di mighaa nematay dé Saulo i, migpetoyò ma dé kininagpaan di ma sa hagdi sundang. 6Huenan di, egoh iya wé agdaw neseselengan da Saulo i nematay sa telu anak di maama owoy sa atung tegeuwit sa langun taman di eggila owoy sa langun sundalu di ma.

7Na, sa medoo tegeIslaél mig-ugpà diyà sa sugud kenà da migsegilaway owoy sa medoo mig-ugpà tanà dutu lawa't Holdan, egoh da neketiig migpelaguy dé sa medoo sundalu tegeIslaél owoy nematay ma dé Saulo i lapeg sa telu anak di maama, sinalidan da sa medoo menuwa da enù ka migpelaguy da ma. Huenan di, mig-angay da eg-ugpà sa medoo tegePilistiya dahiya.